

Laungan 'Hidup Muhyiddin, Kekalkan Muhyiddin' bergegar di PWTC
The Malaysian Insider
Sept 9, 2015
Oleh Nabihah Hamid

Lebih 100 penyokong Tan Sri Muhyiddin Yassin daripada Umno Johor, majoritinya Bahagian Pagoh, berhimpun di ibu pejabat Umno di Menara Dato' Onn, Kuala Lumpur kira-kira jam 4 petang ini sambil melaungkan slogan 'Hidup Muhyiddin, Kekalkan Muhyiddin'.

Berpakaian serba hitam dengan baju yang dicetak muka timbalan naib presiden itu, dengan tulisan 'The Authentic Leadership', mereka mendesak agar kepimpinan Muhyiddin dikekalkan dalam parti Umno.

Mereka turut memegang poster dan plakad yang bertulis 'Kekal Muhyiddin'.

Sementara menunggu mesyuarat Majlis Tertinggi Umno selesai pada petang ini, mereka menyanyikan lagu kebangsaan dan lagu parti serta menyatakan sokongan mereka kepada Muhyiddin dan parti.

Ahli Umno Cawangan Batu Pahat Ramlee Wahab berkata, perhimpunan aman mereka hari ini bertujuan menunjukkan sokongan kepada Muhyiddin.

"Kami hadir sebagai solidariti kepada Muhyiddin. Kami mahu beliau kekal sebagai timbalan presiden Umno. Kami tak buat kecoh, kami berhimpun secara aman di sini," katanya. – 9 September, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/laungan-hidup-muhyiddin-kekalkan-muhyiddin-berlegar-di-pwtc>